



Dienst Uitvoering Onderwijs  
*Ministerie van Onderwijs, Cultuur en  
Wetenschap*

# Finansiamentu di estudio

pa studiante di Aruba, Kòrsou, Sint  
Maarten i Hulanda Karibense



# Bon biní na DUO

Duo ta para pa: Dienst Uitvoering Onderwijs. DUO ta hasi enseñansa posibel. Asina por ehèmpel DUO ta regla e finansiamentu di estudio i e pagamentu bèk di e eventual debe di estudio. E foyeto aki ta trata di e temanan aki. Bo por lesa hopi informashon tambe riba [duo.nl/antillen](https://duo.nl/antillen).

*Huntu nos ta hasi enseñansa i desaroyo posibel*

## Contents

### Finansiamentu di estudio mbo 4

- Mbo 1 i 2 4
- Mbo 3 i 4 4
- Registrá 4
- Paga sèn di lès 4

### Finansiamentu di estudio hbo i universidat 5

- Krédito di matríkula 6
- Registrá 6
- Chèk di eskoho di estudio 6
- Eksigensianan adishonal pa atmishon 6
- Numerus fixus 6

### Informashon general tokante finansiamentu di estudio 7

- E kondishonnan 7
- Beka básiko 8
- Beka adishonal 8
- Entrada di e mayoran 8
- Problema ku mayor 9
- Produkto di biahe pa studiante 9
- Fiansa ku interes 9
- Asistente di kalkulashon 9

### Kiko bo mester regla promé ku bo sali? 9

- Solísitá finansiamentu di estudio 9
- Haña bo BSN 10
- Solísitá i aktivá DigiD 10
- Kuenta di banko hulandes 10
- Traha sita serka munisipio 10
- Kanselá inskripshon serka atministrashon di poblashon 10
- Solísitá akta di nasementu 10

### Despues di bo yegada na Hulanda 11

- Manda bo kuenta di banko 11
- Kontrola bo datonan riba MijnDUO 11
- Produkto di biahe pa studiante 11

### Despues di bo estudio 12

- Stòp 12
- Stòp e produkto di biahe pa studiante 12
- tòp den e promé aña 12
- A haña diploma 13

### Paga bèk 13

- Baha e suma mensual 13
- No paga bèk temporalmente 13
- Duna notifikashon di bo entrada 14
- Tene bo datonan aldía 14
- Regla asuntunan online serka DUO 14

### Paga bèk lokalmente 14

- Kiko bo mester hasi? 15

## Finansiamentu di estudio mbo

Finansiamentu di estudio pa mbo ta konsistí di 4 parti: un beka básiko, un beka adishonal, un produkto di biahe pa studiante i un fiansa ku interes. Abo mes ta disidí kua partinan bo ta pidi.

Pa mbo, e finansiamentu di estudio ta kuminsá for di e kuartal despues di e fecha ku bo a kumpli 18 aña. E produkto di biahe sí bo por haña si bo no tin 18 aña ainda.

Si abo mes ta kuida un yu menor di 18 aña, kisas bo tin derecho riba un suplemento. Banda di bo finansiamentu di estudio bo por gana sèn èkstra sin límitashon. Esaki no tin konsekuensia pa bo finansiamentu di estudio.

### Mbo 1 i 2

Bo ta hasi un estudio na nivel 1 òf 2? E ora ei, bo beka básiko, bo produkto di biahe pa studiante i bo eventual beka adishonal semper ta un donashon. E fiansa ku interes sí semper bo mester paga bèk. Bo ta haña finansiamentu di estudio tanten ku bo ta inskribí pa un estudio na nivel 1 òf 2.

### Mbo 3 i 4

Bo ta hasi un estudio na nivel 3 òf 4? E ora ei, e beka básiko, e beka adishonal i e produkto di biahe pa studiante ta un asina yamá prestatiebeurs, beka di logro. Nan ta bira un regalo solamente si bo ta haña bo diploma denter di 10 aña. Nos ta yama esaki e término di diploma. E 10 aña ta kuminsá for di e promé luna ku bo haña finansia-

mentu di estudio.

Ta kobra interes riba e beka di logro, for di e promé luna ku bo haña e beka di logro.

Bo ta haña bo diploma na tempu? E ora ei, e interes aki tambe ta bira un donashon.

Bo no ta logra haña diploma? E ora ei, bo mester paga tur kos bèk: bo beka básiko, bo beka adishonal i bo produkto di biahe pa studiante. Inklusio e interes akumulá.

Solamente e beka adishonal di bo promé diesdos luna di finansiamentu di estudio semper bo por keda kuné, tambe sin diploma.

E beka di logro bo ta haña pa 4 aña. Despues bo por fia i hasi uso di bo produkto di biahe pa studiante 3 aña mas. Pa un estudio di spesialisista bo por haña finansiamentu di estudio èkstra (komo máximo 2 aña). Bo mester usa bo derecho di finansiamentu di estudio denter di dies aña.

### Registrá

Tuma kontakto ku e skol pa registrá bo mes. Registrá promé ku 1 di aprel. Tin estudio ku ta pone rekisito promé ku nan ta atmití bo.

### Paga sèn di lès

Pa un estudio mbo bo mester paga DUO sèn di lès (lesgeld). For di edat di 18 aña bo ta paga sèn di lès solamente pa edukashon fultaim. Aki no ta importá si bo ta sigui lès òf kore stazje.

E aña eskolar ta kuminsá ofisialmente riba promé di ougùstùs. Es ku riba promé di ougùstùs tin 18 aña òf mas, mester paga sèn di lès pa e aña eskolar ei. Bo por paga e sèn di lès di diferente manera:



- Abo mes por paga den 1 biaha via iDEAL
- Den 9 término via kobro outomátiko
- Otro hende por paga den 1 biaha òf den 9 término via kobro outomátiko

## Finansiamentu di estudio hbo i universidat

Finansiamentu di estudio pa hbo i universidat ta konsistí di 5 parti: beka básiko, beka adishonal, produkto di biahe pa studiante, un fiansa ku interes i krédito di matríkula (collegegeldkrediet).

Pa enseñansa superior no tin un edat máksimo. Bo por haña finansiamentu di estudio tambe si bo no tin 18 aña ainda. Banda di bo finansiamentu di estudio tambe bo por gana sèn èkstra sin límitashon.

E beka básiko, e beka adishonal i e produkto di biahe pa studiante ta un prestatiebeurs, beka di logro. Nan ta bira un donashon solamente si bo ta haña bo diploma denter di 10 aña. E 10 aña ta kuminsá for di e promé luna ku bo ta haña finansiamentu di estudio. Ta kobra interes riba e beka di logro, for di e promé luna ku bo haña e beka di logro. Bo ta haña bo diploma na tempu? E ora ei, e interes aki tambe ta bira un donashon. Bo no ta logra haña diploma? E ora ei, bo mes-ter paga tur kos bèk, inkluso e interes akumulá. Ku eksepsion di e promé sinku luna di beka adishonal, esei semper bo por keda kuné. Tambe sin diploma. Un fiansa semper bo mester paga bèk, inkluso e interes.

## Krédito di matrikula

Si bo ta studia na un hogeschool òf universidat, bo mester paga matrikula (collegegeld) na bo institushon di enseñansa. Banda di e fianza ‘regular’, studiante na hbo òf universidat tambe por aplika pa un fianza pa paga matrikula. Ta yama e fianza aki collegegeld-krediet (krédito di matrikula) i e ta forma parti di e finansiamentu di estudio. Si bo ta studia na hbo òf universidat, bo por pidi e krédito di matrikula pareu ku sobrâ di bo finansiamentu di estudio. Ta paga e krédito di matrikula mensualmente. Pa krédito di matrikula tambe ta konta ku semper mester pagé bèk na DUO despues di bo estudio, ku interes.

## Registrá

Subi riba [studielink.nl](https://studielink.nl) pa registrá pa bo estudio. Riba e wèpsait di Studielink, serka ‘Internationale studenten’ skohe ‘Account aanmaken’.

Hasi esaki pa mas tardá riba promé di mei, tambe si bo no tin diploma ainda di bo formashon preparatorio. Bo ta registrá despues di promé di mei? E ora ei, e skol superior òf universidat no tin obligashon di atmití bo. Pa estudio ku ta selektá nan studiantenan, hopi bia bo mester registrá kaba pa mas lat 15 di yanüari. P’esei, bishitá e wèpsait di e skol superior òf universidat for di awor pa haña sa kua ta e último fecha ku por registrá. Despues di bo registrashon, bo ta haña un email di Studielink tokante e prosedura ku ta sigui.

## Chèk di eskoho di estudio

Si bo a registrá pa mas tardá riba promé di mei, e institushon por ofresé bo un chekeo di eskoho di estudio pa e estudio ku bo a registrá p’e. E ora ei, despues di a registrá bo ta risibí un invitashon pa un chekeo asina. Ki aparensia esaki tin, ta varia pa kada estudio. Por trata di un kòmbersashon, kòlezjenan di prueba, un lista digital di pregunta òf algu otro. Asina bo ta chèk si enberdat e estudio ta pas ku bo.

Pasobra bo ta biba na Kòrsou, Aruba, Sint Maarten òf na Hulanda Karibense, e skolnan superior i universidatnan lo pèkurá pa bo por hasi e chekeo di eskoho di estudio. Pues bo no tin nodi di bini Hulanda pa esei. Asina ta parâ den lei.

Si despues di e chekeo di eskoho di estudio tòg bo ke skohe un otro estudio, esaki ta posibel. Pasobra bo a registrá pa mas tardá promé di mei na Studielink, bo ta keda ku e derecho di atmishon na otro estudio. Pues no ta nesesario pa bo registrá pa diferente estudio pareu porsiakaso.

## Eksigensianan adishonal pa atmishon

Chèk riba e wèpsait di bo estudio si tin eksigensianan èkstra pa atmishon na vigor, manera un profil òf sierto materia ku bo mester a sigui den enseñansa sekundario. Un diploma di propedeuse hbo no ta duna derecho di atmishon outomátiko na universidat mas.

## Numerus fixus

Tin estudio na hbo i universidat ku tin kupo limitá. Esakinan nos ta yama *fixusopleidingen*.

Pa un fixusopleiding bo mester registrá pa mas tardá riba 15 di yanüari. E kriterionan di selekshon por varia pa kada institushon di enseñansa. Chèk esaki riba e wèpsait di e institushon di enseñansa ku bo ke bai.

## Informashon general tokante finansiamentu di estudio

### E kondishonnan

Bo tin derecho riba finansiamentu di estudio si bo ta kumpli ku e siguiente

kondishonnan:

- bo mester ta mas hóben ku 30 aña ora bo finansiamentu di estudio ta kuminsá;
- bo ta sigui un ruta di edukashon profesional fultaim (mbo bol) di komo mínimo 1 aña òf bo ta sigui un edukashon fultaim òf dual na hbo òf universidat di komo mínimo 1 aña;
- bo tin nashonalidat hulandes.

Bo tin un pèrmit di estadia tipo I? E ora ei, kisas bo por haña finansiamentu di estudio. Pa mas informashon tokante e kondishonnan, wak riba duo.nl.





### **Beka básiko**

Tur hende ku ta kumpli ku e kondishonnan básiko pa finansiamentu di estudio por solisitá un beka básiko. E haltura di e beka básiko ta dependé di bo situashon di biba. Aworó bo ta biba serka (un di) bo mayornan? E ora ei, bo ta *thuiswonend*. Bo no ta biba ku bo mayor(nan)? E ora ei, bo ta *uitwonend*. E beka básiko ta mas haltu si bo ta *uitwonend*.

### **Beka adishonal**

Ku bo por haña un beka adishonal ta dependé di e entrada di bo mayornan. Mas abou e entrada di bo mayornan, mas haltu e suma

di beka adishonal ku bo ta haña. Tambe nos ta tene kuenta ku e kantidat di yu ku nan ta kria i si bo mayornan ta pagando bèk un debe di estudio.

Semper solisitá e beka adishonal. Esaki bo tin ku hasi un bia so. E ora ei, tur aña nos ta kalkulá si bo tin derecho riba esaki.

### **Entrada di e mayornan**

Si bo ta solisitá un beka adishonal, DUO mester di e datonan di entrada di bo mayornan. Ta trata di e entrada di dos aña pasá. E datonan aki bo mester manda huntu ku e formulario di solisitut, pa asina DUO por kalkulá bo beka adishonal lihé. Ku 'bo may-





ornan' nos ke men bo mayornan natural òf di adopshon. Bo mayornan ta pará riba bo akta di nasementu.

Si e entrada a baha despues di e aña di peilu, bo mayornan por pidi pa basa esaki riba un aña di entrada mas lat. Un kondishon ta ku e entrada a baha un mínimo di 15% kompará ku e aña di peilu.

### Problema ku mayor

Tin biaha nos no sa ken bo mayornan ta. Òf nan no ke koperá. E ora ei, tòg tin posibilidat pa haña un beka adishonal òf un suplemento. Bo por pidi nos pa laga e entrada di bo mayor 'fuera di konsiderashon'. E ora ei, por ta ku bo ta haña un beka adishonal (mas haltu). Subi riba e [duo.nl/antillen](https://duo.nl/antillen) pa mas informashon.

### Produkto di biahe pa estudiante

E produkto di biahe pa estudiante ta forma parti di e finansiamentu di estudio. Ku e produkto di biahe pa estudiante bo por biaha grátis òf ku deskuento ku trèin, tram, bús i metro den henter Hulanda. Bo por skohe pa un abono di den siman òf di fin di siman. Bo ta hasi un estudio mbo? E ora ei bo tin derecho riba dje miéntras ku bo tin derecho riba finansiamentu di estudio.

Pa un estudio na hbo i universidat bo tin derecho riba un produkto di biahe pa estudiante durante e durashon ofisial (nominal) di bo estudio i e promé aña despues di esaki. Por sierto, solamente tanten ku bo ta inskribí na e estudio i bo tin derecho riba finansiamentu di estudio.

Pa e mayoria di e estudionan esaki ta un total di 5 aña.

Pa por biaha ku bo abono bo mester di un karchi di OV-chip personal. Riba esaki bo mes mester pone e abono. Mira riba [studentreisproduct.nl](https://studentreisproduct.nl) pa mas informashon.

### Fiansa ku interes

Bo mester di sèn èkstra pa bo estudio? E ora ei, bo por fia. Bo no tin nodi di fia maksimalmente, ménos tambe por. Esei abo mes ta disidí. Tur luna bo por adaptá òf kanselá e fianza. E fianza semper bo mester paga bèk despues di bo estudio, ku interes.

### Asistente di kalkulashon

Riba [duo.nl/rekenhulp](https://duo.nl/rekenhulp) bo ta haña tur sorto di asistensia di kalkulashon útil. Por ehèmpel, tin un asistente di kalkulashon kaminda abo mes por kalkulá kuantu finansiamentu di estudio bo por haña mas o ménos. Tambe tin un asistente ku ta yudá bo por kalkulá kuantu bo mester paga bèk mensualmente despues di bo estudio.

## Kiko bo mester regla promé ku bo sali?

### Solisitá finansiamentu di estudio

Bo mester solisitá finansiamentu di estudio na tempu serka DUO. Hasi esaki por lo ménos 3 luna promé ku bo kuminsá bo estudio. Konsultá e chèklist *Studiefinanciering aanvragen vanuit het Caribisch gebied* riba [duo.nl/antillen](https://duo.nl/antillen) pa mas informashon. Bo ta solisitá finansiamentu di estudio ku un formulario:

[- Formulario 'Aanvraag studiefinanciering voor mbo' pa studiante na mbo](#)

[-Formulario 'Aanvraag studiefinanciering hoger onderwijs' pa studiante na hbo òf universidat](#)

### Haña bo BSN

Bo tin nashonalidat hulandes i ainda bo no tin burgerservicenummer (BSN)? E ora ei, bo ta haña un BSN na momentu ku bo ta solisitá finansiamentu di estudio. Ku bo BSN, bo por kuminsá reglá algun kos na Hulanda, tambe si bo no ta na Hulanda ainda.

Bo ta haña un karta ku bo BSN di Rijksdienst voor Identiteitsgegevens (RvIG). Tambe bo por puntra DUO via telefòn kiko bo BSN ta. Promé ku bo hasi esei, warda DUO manda bo un koreo elektróniko ku e mensahe ku a tramitá bo solisitu di finansiamentu di estudio. Den e koreo elektróniko ei tin pará riba kua number di telefòn bo por puntra pa bo BSN.

### Solisitá i aktivá DigiD

Ku bo BSN bo por solisitá un DigiD. DigiD ta e hèrmènt pa login online serka instanshanan di gobièrnu. Bo mester di bo DigiD entre otro pa bo produkto di biahe pa studiante i pa login riba Mijn DUO. Den e plan di paso *DigiD aanvragen vanuit het buitenland* riba [duo.nl/antillen](https://duo.nl/antillen) nos ta spliká bo di ki manera bo por solisitá i aktivá un DigiD for di Karibe.

### Kuenta di banko hulandes

Ku un BSN bo por habri un kuenta di banko hulandes. Asina bo tin bo number di kuenta, pone DUO na altura via Mijn DUO. DUO

mester di bo number di kuenta pa paga bo finansiamentu di estudio. DUO solamente ta depositá finansiamentu di estudio riba un number di kuenta hulandes.

### Traha sita serka munisipio

Denter di 5 dia despues di bo yegada na Hulanda, obligatoriamente bo mester registrá den e Registrashon Básiko di Persona (BRP) di e munisipio kaminda bo ta bai biba. Chèk e wèpsait di e munisipio si bo por traha un sita delantá.

### Kanselá inskripshon serka atministrashon di poblashon

Denter di 10 dia promé ku bo sali, kanselá bo inskripshon den registro sivil serka e atministrashon di poblashon di e isla kaminda bo ta biba. Na momentu di kanselá, indiká den kua munisipio bo ta bai biba na Hulanda. Hiba e prueba di kanselashon Hulanda ku bo. Esaki ta un di e dokumentonan ku bo mester pa e inskripshon na Hulanda. Bo por lesa mas informashon tokante di esaki den e [Informatieblad voor studenten uit het Caribisch gebied](#).

### Solisitá akta di nasementu

Mésora solisitá un akta di nasementu serka e atministrashon di poblashon di e munisipio kaminda bo a nase. Bo mester di esaki pa solisitá finansiamentu di estudio si bo no ta rekonosé i posibelmente tambe pa e inskripshon serka munisipio na Hulanda. Hiba e dokumento original Hulanda ku bo.



## Despues di bo yegada na Hulanda

Inskripshon den e BRP serka munisipio  
Si bo ta keda Hulanda mas ku 4 luna, bo ta obligá pa inskribí den e BRP. Bo mester hasi esaki denter di 5 dia despues di bo yegada na Hulanda, serka e munisipio kaminda bo ta bai biba. Informá nan ku bo tin BSN kaba.

Dokumentonan ku bo mester:

- pasport bálido
- e prueba original di kanselashon di bo inskripshon den e atministrashon di poblashon (PIVA)
- prueba di adrès na Hulanda. Por ehèmpel un kopia di e kòntrakt di hür òf un karta ku firma i kopia di e sèdula di e habitantenan prinsipal, si ta asina ku e persona ta duna pèmit pa bo biba serka dje.

### **Manda bo kuenta di banko**

Ora bo hanja bo kuenta koriente, bo por manda e nùmeru dibo kuenta koriente riba MijnDUO. DUO mester e nùmeru di bo kuenta koriente pa por paga bo finansiamentu di estudio.

### **Kontrola bo datonan riba MijnDUO**

Drenta ku bo DigiD riba Mijn DUO i kontrolá si bo datonan manera bo e-mail i bo nùmeru di bo kuenta di banko ta korekto. Riba MijnDUO bo por mira kuantu bo finansiamentu di estudio ta i mensahenan personal tambe.

### **Produkto di biahe pa studiante**

Bo a solisitá e produkto di biahe pa studiante? Bo mester di un OV-chipkaart personal pa por biaha ku e produkto di biahe pa studiante. Despues di a haña e OV-chipkaart,



ainda bo mester kòpel e produkto di biahe pa studiante i tumé serka un mashin di entrega. Konsultá e chèklist *Studiefinanciering aanvragen vanuit het Caribisch gebied* riba [duo.nl/antillen](https://duo.nl/antillen) pa mas informashon.

## Despues di bo estudio

### Stòp

Si bo stòp òf kaba ku bo estudio, abo mes mester para bo finansiamentu di estudio i e produkto di biahe pa studiante. Yena e [wiz-zigingshulp](https://wiz-zigingshulp.duo.nl/klaarmetjestudie) riba [duo.nl/klaarmetjestudie](https://duo.nl/klaarmetjestudie). Den un minüt bo sa kiko bo mester regla.

### Stòp e produkto di biahe pa studiante

Bo mes tin ku stòp bo produkto di biahe pa studiante serka un mashin di entrega, promé ku òf riba e di dies dia di kalènder

di e promé luna den kua bo no tin derecho mas riba esaki. For di e promé dia di e luna ei kaba bo no por biaha mas ku bo produkto di biahe pa studiante. Bo ta para bo produkto di biahe pa studiante muchu lat i bo ta sigui biaha kuné? Bo ta haña un but. Bo a buska un produkto di biahe pa studiante pero tòg bo no ta bai studia? E ora ei, bo mester para bo produkto di biahe mas promé. Esaki mester sosodé promé ku e promé dia di e luna ku bo finansiamentu di estudio lo a drenta na vigor.

### Stòp den e promé aña

Bo ta hasi mbo 3 òf 4, hbo òf universidat i bo ta stòp den e promé aña? Si bo ta para bo finansiamentu di estudio pa mas lat riba promé di febrüari, bo no tin nodi di paga e beka básiko, e beka adishonal i e produkto di biahe pa studiante bèk. Un fiansa ku

interes naturalmente sí bo mester paga bèk. Bo tin un diploma di mbo kaba? E ora ei, asta bo ta haña 1 año di tempu pa bo purba un estudio hbo. Si bo stòp ku bo estudio promé ku promé di sèptèmber ta konvertí e beka básiko, e beka adishonal i e produkto di biahe pa studiante den un donashon.

### A haña diploma

Bo beka básiko, beka adishonal i produkto di biahe pa studiante – inkluso e interes – ta bira un donashon si bo ta logra haña bo diploma denter di 10 año. Bo debe di estudio ta bira ménos òf asta por vense kompletamente. E montante ku ta konvertí den donashon ta dependé di e balor di bo diploma. P’esei DUO mester di un prueba. Mayoría bia nos ta haña esaki outomátikamente di bo skol òf universidat.

## Paga bèk

Bo no tin nodi di paga bo debe di estudio mésora. Ora bo derecho riba finansiamentu di estudio ta kaduká, e ora ei riba promé di yanüari di e año siguiente e asina yamá fase inicial (aanloopfase) ta kuminsá. Esaki ta un temporada di 2 año den kua bo no tin nodi di paga bèk ainda. Naturalmente ta permití sí pa kuminsá paga bèk. Bo ta paga interes riba bo debe di estudio. For di e fase inicial, kada biaha ta fiha e tasa di interes pa 5 año. Despues di e fase inicial di dos año, ta kuminsá e fase di paga bèk riba promé di yanüari. For di e momento ei bo ta obligá di paga bèk mensualmente. Bo ta paga bo

debe komplemento den 15 òf 35 año. Esaki ta dependé di bou di ki reglanan di paga bèk bo ta kai. E montante ku bo mester paga bèk pa luna ta dependé di e haltura di bo debe, e durashon di e fase di paga bèk i e tasa di interes.

### Baha e suma mensual

Despues di bo estudio, bo ta muda bèk pa Karibe i bo tin un debe di estudio? E ora ei, bo por pidi nos pa tene kuenta ku bo entrada ora di kalkulashon di bo suma mensual. Kisas e ora ei bo por paga ménos òf asta nada mes. Bo por informá DUO di bo entrada via Mijl DUO òf via e formulario *Opgave inkomen voor verzoek verlagen maandbedrag*. Bo ta haña e formulario riba [duo.nl/antillen](https://duo.nl/antillen). Bo ta keda biba na Hulanda? E ora ei, Belastingdienst na Hulanda ta informá nos outomátikamente di bo entrada.

### No paga bèk temporalmente

Tur hende ku ta pagando un debe di estudio bèk, por suspendé e pago di nan debe di estudio temporalmente. E motibu no ta importá: un biahe rònt mundu, un matrimonio, kumpra di un outo, un kas nobo. Bo por suspendé e pago di bo debe di estudio un mínimo di 1 luna i un máksimo di 5 año. Pensa bon tokante e uso di e lunanan, pasobra si a kaba, a kaba. Paga tinu! E interes riba bo debe si ta sigui kore i ta prolongá e término máksimo di paga bèk di 15 of 35 año ku e kantidat di luna sin paga bèk ku bo ta usa. E pago di eventual atrasonan di pagamentu bo no por para (temporalmente).



### **Duna notifikashon di bo entrada**

Semper kontrolá si a kalkulá bo suma mensual a base di bo entrada. No ta asina? E ora ei, abo mes por informá nos tokante di bo entrada. Asina nunca bo no ta paga di mas.

### **Tene bo datonan aldia**

Bo ta bai Karibe bèk despues di bo estudio i bo tin un debe di estudio? Pèrkurá pa DUO semper tin bo datonan aktual, manera bo adrès, koreo elektròniko i number di telefòn. Si bo adrès ta registrá inkorekta-mente serka DUO, pone DUO na altura di bo adrès den strañero via Mijn DUO òf e [formulario Wijziging terugbetalen studieschuld](#).

### **Regla asuntunan online serka DUO**

Aworó bo ta kla ku bo estudio i bo tin un debe di estudio pa paga bèk? E ora ei, bo

por regla bo asuntunan serka DUO fásil i lihé online via Mijn DUO. Den Mijn Duo bo tin bista riba bo debe di estudio, bo por solisitá bahamentu di bo suma mensual, duna notifikashon di kambionan i lesa bo mensahenan. Bo ta login ku bo DigiD.

## **Paga bèk lokalmente**

Bo ta biba den Karibe? E ora ei, bo por registrá pa paga bèk lokalmente. Esaki ta nifiká ku bo ta depositá e debe di estudio den un number di kuenta lokal, den bo propio valuta. Por ehèmpel na dòler merikano, florin antiano òf florin di Aruba. Den mayoria di kaso esaki ta mas barata ku transferí pa un number di kuenta hulandes. Konsultá e chèklist [Lokaal terugbetalen](#) riba [duo.nl/antil-](#)



[len](#) pa mas informashon tokante di paga bo debe di estudio bèk lokalmente.

### **Kiko bo mester hasi?**

Bo por registrá pa paga bèk lokalmente mandando e formulario *Aanmelden of afmelden Lokaal betalen* pa [antillen@duo.nl](mailto:antillen@duo.nl). Pone komo tópiko: 'Lokaal terugbetalen'.

Bo ta registrá promé ku 1 di desèmber? E ora ei, e pagamentu bèk lokal ta kuminsá for di yanüari. Bo ta paga tur 12 plaso den bo mes valuta.

Bo ta registrá mas lat? E ora ei, e pagamentu bèk lokal ta kuminsá entrante e luna despues ku nos a prosesá bo registrashon. Te e tempu ei, bo ta paga bo términonan na euro riba e kuenta di banko hulandes di DUO.

Despues ku bo a registrá bo ta haña un koreo elektróniko. Den e koreo elektróniko ei tin pará:

- kua suma bo mester paga bèk, na euro i na bo propio valuta;
- riba kua number di kuenta i ku kua referensia bo mester transferí e sèn;
- ki dia pa mas lat e promé pago mester yega serka nos.

### **Dato di DUO na Hulanda**

ING Bank N.V.  
Foreign Operations  
PO Box 1800  
1000 BV Amsterdam  
The Netherlands

### **IBAN**

NL45 INGB 0705 0019 03

### **BIC**

INGB NL2A

E foyeto aki ta un edishon di:  
Dienst Uitvoering Onderwijs  
Postbus 30155 | 9700 LG Groningen  
[duo.nl/antillen](https://duo.nl/antillen)

© Rijksoverheid | april 2024  
Nr. di publikashon 8413PU-014  
Fotografia: Marieke Kijk in de Vegte

*A traha e foyeto aki na april 2024 aplikando lei i  
regla di e momento ei. Pa e situashon aktual nos  
ta referi na [duo.nl/antillen](https://duo.nl/antillen).*